

FORUM

Legislativa, executiva e giudicativa en in di!

Las scholaras ed ils scholars dalla tiarza reala e secundara dall’annada 2010 da Mustér han ils 29 d’uost 2025 giu in eveniment tut special. Els han astgau visitar a Cuera la legislativa, l’executiva e la giudicativa dil cantun Grischun durent in di. Ils parlamentararis dalla Cadi, *Martin Kreiliger*, *René Epp* e *Clemens Berther*, han envidau la tiarza superiura da Mustér da visitar ils treis secturs dalla pussonza dil stadi dil cantun Grischun a Cuera.

La legislativa,...

Il viadi ha entschiet allas 7.44 a Mustér cun ina cumposiziun dubla dils novs «Capricorns» dalla Viafier retica. Arrivai punctualmein e bein preparai a Cuera ha ei dau ell’ustria vischinonta ina tschugalata caulda per haver avunda forza per quei di plein informaziuns. Allas 10.00 ein las scholaras ed ils scholars vegni beneventai dils parlamentararis Martin Kreiliger, René Epp e Clemens Berther avon la casa dil Cussegl grond, l’anteriura caserna da Cuera («Grossratsgebäude», Masanserstrasse 1).

Bunamein in’ura han las scholaras ed ils scholars saviu suandar dalla tribuna anora las discussiuns dil Cussegl grond a caschun dalla sessiun d’uost. Ina damonda tractava denter auter la finanziaziun dallas scolas dil Grischun. Nus vein spert encurschiu che singuls parlamentararis gavischassen da sustener las scolas grischunas cun dapli daners, ferton che auters ein encunter.

...l’executiva...

Allas 12.00 eis ei stau temps da midar liug ed instituziun. A pei essan nus serendi tier la Casa Grischa («Neues Gebäu», Reichsgasse 35). Las scholaras ed ils scholars da Mustér han giu la honur da vegnir beneventai dil cusseglier guvernativ *Jon Domenic Parolini*. La casa historica, che Andreas von Salis-Soglio ha schau baghegiar 1751 – 1752 ei impressiunonta. Sisum han las scholaras ed ils scholars era astgau contemplar la sala da seduta. En quei liug lavura la executiva, la regenza grischuna. El grond tschaler dalla casa ha ei dau in refrestg avon che se-render tier la proxima istanza.

... e la fin la giudicativa

Allas 14.00 ein las scholaras ed ils scholars i vina-von tier la Dertgira superiura, in stabiliment digl onn 1727, che Peter von Salis ha schau baghegiar («Altes Gebäu», Poststrasse 14). Quella istanza mida lu proximamein el niev liug alla Grabenstrasse 30 che vegn actualmein sanaus per 30 milliuns. En quei liug historic cun siu bellezza parc avon casa ein las scholaras ed ils scholars vegni beneventai da *Remo Cavegn*, il president dalla Dertgira superiura. Ins ha buca mo viu las impressiunontas salas che vegnan duvradas sco biros, mobein era la sala da dertgira che ha pauc da far cun las salas da dertgira ch’ins vesa els films da Hollywood.

Aschi bia informaziuns e nova savida fan fom e las scholaras ed ils scholars han aunc giu peda da magliar enzatgei el stil «american». Allas 15.55 han ils dus «Capricorns» dalla Viafier retica menau la superiura da Mustér anavos ella Cadi.

Christoph Berger,
scolast scalem superiur Mustér



Avon la casa dil Cussegl grond.



La tiarza superiura da Mustér avon la Casa Grischa cun Jon Domenic Parolini.



Silla tribuna dalla casa dil Cussegl grond.